

Rau Tau Yoan Iboode Imin Maata 1 Jon—1 John

Neer tau imin eez pait to tagham lepoogh poia ila to Maaron

¹ Yei nivovotia saveen maata yaryaare pa neer tau ipaghazonai ghiit pa saveen ve ngar to Maaron, ve imin eez pait to tagham lepoogh poia. Muun geeg, saawe tau gabua eta ivot soone ve ilam, neer tawe ilepleep. Ve i izilam ileep tomani ghei, ve niloon saveen tooni ila i tauu aavo, nighita pa matamai, ve nikisi pa nimamai. Tauta nighilaalo kat. *

² Tauvene neer tau imin eez pait to tagham lepoogh poia ila to Maaron, tauta ivot ighazon gha nighita wa. Ta muun ve ilam, yesuru Taama tilepleep. Ve aazne, i ivot ighazon payei gha nighita. Tauta nipariaan saveen tooni, ve nivovotia vaaru payam. Leso aghur ila tooni ariaan, ve aleep matamim yaryaare le alok. *

³ Tauvene gabua tau yei nighita ve niloon, tauta nivotia payam. Leso yam alam alup gham tomani ghei, ve itinja Tamaan Maaron ve Naatu Yesu Krisi tavalupu ghiit tamin eemon. *

⁴ Saveen tane, niboode lesa itinja loloon poia le poia kat. *

* **1:1:** Lu 1:2; Yo 1:1, 14, 20:27; 2Pe 1:16

* **1:2:** Yo 1:4, 21:24

* **1:3:** Yo 17:21 * **1:4:** Yo 15:11

Talaagh ila ghazoonja to Maaron

⁵ Saveen tau niloonja ila Yesu Krisi tauu aavo, tauta nivotia payam. Isaav tauvene ighe: Maaron, i ghazoonja tauu. Ngar to ndoroom rigta igheen tooni mako. *

⁶ Tauvene ighe tasaav taghe itinja Maaron lupuun toit eemon, ve laghoon toit itaghton ngar to ndoroom, ene tataghton saveen onoon mako. Tagham karom. *

⁷ Ve isaav ighe laghoon toit, tataghton ghazoonja to Maaron imin i tauu ilepleep ila ghazoonja tooni loolo, ene aat itinja tavalupu ghiit tamin eemon, ve Maaron Naatu Yesu sin tooni irewaar sosor toit isov ilale, ve igham ghiit tangalaan ila Maaron maata. *

Tangooz sosor toit sov

⁸ Isaav ighe tasaav taghe iit leen sosor eta mako, ene tagham karom pa tauun, ve saveen onoon igheen ila loloon mako. *

⁹ Ve isaav ighe tavotia sosor toit ila to Maaron, i pale ireu zi itaghton ngar duduunja *
ve saveen mbuaan tooni. Ngar toit tau iduduun mako na, i pale ireua isov ilale, leso igham ghiit tangalaan ila maata. *

* **1:5:** 1Tim 6:16; Yems 1:17

* **1:6:** 2Kor 6:14; 1Yo 2:11

* **1:7:**

Ep 1:7; Hib 9:14; Syg 7:14

* **1:8:** Ro 3:9, 23

* **1:9:** Maaron irau

ireu sosor toit sorok mako. Pasaa, i le uraat to igabiiz tamtamon ve ighur atuya pa sosor toozi. Eemon saawe tau Yesu imaat izala ai pambaroon, i ibaad suvinia atuya to sosor to tamtamon tooni. Puughu tane ta aazne, isaav ighe Maaron ireu sosor to tamtamon tooni, ene iduduun. *

1:9: Mbo 32:5, 51:2; Yems 5:16

¹⁰ Tauvene isaav ighe tasaav taghe iit tagham sosor eta mako, ene itotoi ghiit ighe saveen to Maaron igheen ila loloon mako. Ve ene imin tasaav pani taghe i neer to karom.

2

Yesu Krisi, i Uleenja toit

¹ O natugnja, yau nabood saveen tane payam, leso ayooz ariaan, ve agham sosor sov. Eemon isaav ighe tamtamon eta itap ve igham sosor, iit leen neer duduunja ee tau ivolvool toit, ve igham avoon gha isasavia saveen toit ila to Tamaan Maaron, ene Yesu Krisi. *

² I imaat imin watoonrau, leso ireu sosor toit, ve itatan aatyavyav to Maaron. Uraat tooni tawe, i igham pa iit mon mako. Igham pa tamtamon tisov to taan. *

Tamtamon tau ighe iwatagh Maaron, ene aat itaghon tutuun tooni

³ Isaav ighe mataan kisin Maaron tutuun tooni ve tataghon zi irau saawe, ene irau taghilaal taghe iit tawatagh Maaron. *

⁴ Isaav ighe tamtamon eta ighe i iwatagh Maaron, eemon itaghon tutuun tooni mako, ene i neer to karom, ve saveen onoon igheen ila loolo mako.

⁵ Eemon isaav ighe tamtamon eta maata kisin Maaron aliinja ve itaghoni, ene itotoia ighe ngar to loloon pa Maaron igheen ariaan ila loolo wa. Tauvene isaav ighe tataghon ngar tauvene, ene

* **2:1:** Ro 8:34; 1Tim 2:5; Hib 7:25 * **2:2:** Yo 1:29; Ro 3:25; Kol 1:20; Hib 2:17 * **2:3:** Yo 14:15, 21, 15:12

irau tawatagh taghe iit taleep tunjia ila to Maaron.
*

⁶ Tauvene isaav ighe tamtamon eta isaav ighe:
“Yau namin Maaron le ve naleep tunjia ila tooni,”
na i aat itaghon Krisi aaghe niia irau saawe. *

*Isaav ighe taleep ila ghazonja to Maaron, ene
pale loloona pa tamtamon ve tagham poghani zi*

⁷ Yam zetagna tau lolog igheen tsiam kat na,
tutuun tau naboode payam ne, paaghu payam
mako. Ene tutuun munjaana. Akaria lonjaan
wa. Saawe imin maata tau yam aghur ila, ve ilam
aazne, tutuun tane igheen tsiam. *

⁸ Eemon tutuun tau naboode payam ne, aazne
imin paaghu muul. Pa muun, anoonja ivot geeg
mako. Eemon aazne, Krisi igham anoonja ivot. Ve
yam paam atotoi anoonja ivot wa. Pasaa, ghazonja
tauu to Maaron isul ariaan. Tauta ngar to ndo-
room ighe isov tane. *

⁹ Isaav ighe tamtamon eta isaav ighe: “Yau naleep
ila ghazonja to Maaron,” eemon ighur koi pa
tonjetaz eta to Krisi, ene i ilepleep ila ndoroom
lolo soone. *

¹⁰ Ve isaav ighe tamtamon eta lolo pa yes tonjetaz
to Krisi ve ighamgham poghani zi, ene i ilepleep
ila ghazonja to Maaron. Tamtamon tauvene irau
igham tauu, ma zeetja siriv titap ve tipul ghuruun
ila toozi ne mako. *

¹¹ Eemon isaav ighe tamtamon eta ighurghur koi
pa tonjetaz eta to Krisi, ene i ilepleep ila ndoroom

* **2:5:** Yo 14:23; 1Yo 3:24 * **2:6:** Mt 11:29; Yo 13:15; 1Pe 2:21

* **2:7:** Wkp 19:18; Yo 13:34+; 1Yo 3:11 * **2:8:** Yo 8:12; Ro 13:12;

Ep 5:8 * **2:9:** 1Yo 4:20 * **2:10:** Ro 14:13

loolo. I le ghilaloonj mako. Pasaa, ngar to ndoroom ipoon maata wa. Tauta laghoonj tooni, i itaghon ngar to ndoroom, ve ighilaal eez tau itaghoni ne mako. *

Saveen injarui zolman ve geegeu

¹² Natugja, *

yau nabood saveenj tane ilat payam pasaa, ila Yesu Krisi eeza, Tamaan Maaron ireu sosor tsiam isov ilale wa. *

¹³ Ve yam zolmana, nabood saveenj tane payam pasaa, Neer tau ileep muunj ve ilam na, † yam awatagh katini wa. Ve yam geegeu paghpaaghu, nabood saveenj tane payam pasaa, yamja Neer Saghati aparav gha aliivo wa.

¹⁴ Tauvene natugja, yau nabood saveenj tane payam pasaa, yam awatagh Tamaan Maaron wa. Ve yam zolmana, nabood saveenj tane payam pasaa, Neer tau ileep muunj ve ilam na, yam awataghi wa. Ve yam geegeu paghpaaghu, nabood saveenj tane payam pasaa, yam ayooz ari-aan, ve saveenj to Maaron igheen tunja ila lolomim irau saawe, ve yamja Neer Saghati aparav gha aliivo wa. *

Loloon pa gabua to taan tomania taan ngara sov

* **2:11:** 2Pe 1:9; 1Yo 1:6 * **2:12:** Zeran ngara siriv tighe saveenj 'natugja' tane izaan to yes Kristen tisov. Ve saveenj 'zolmana', ene izaan to yes Kristen munjanazi. Ve saveenj 'yam geegeu paghpaaghu,' ene izaan to yes Kristen paghpaaghu. * **2:12:** Mbanj 10:43; 1Kor 6:11 † **2:13:** Zeran ngara katini tighe Neer tau ileep muunj ve ilam, ene Krisi. Ughita 1 Yoan 1:1. * **2:14:** Ep 6:10; Syg 12:11

¹⁵ Yam aghur lolomim pa ngar tomania gabua to taan sov. Pa tamtamon tau ighe ighur loolo pa ngar tomania gabua to taan, ene irau loolo igheen to Tamaan Maaron mako. *

¹⁶ Ngar to taan, iit tawataghi wa: Loloon ighaar pa gabua to uliin, gabua maata maata to taan irav mataan, ve tapakur tauun ezaan pa gabua to it. Ngar tauvene ilam pa Tamaan Maaron mako. Ene ngar to taan. ¹⁷ Taan tomania ngar ve gabua naol to taan tau tamtamon lolozi ighaar pani na, ene pale ilale. Eemon tamtamon tau ighe itaghon Maaron loolo, ene pale ileep le alok. *

Yes tau tizoroor Yesu aliija tighe i Mesia mako, ene timin Krisi koiija

¹⁸ Natugja, ayamaan gham! Pasaa, saawe to Maaron ipasov gabua naol isov, tauta aazne tazaa pani wa. Muun, tisaav payam tighe: “Murei, Yesu koia † ee pale ivot.” Ve aazne, katini tivot wa. Tauvene iit tawatagh: Saawe to Maaron ipasov gabua naol isov, tauta tazaa pani wa. *

¹⁹ Muun, zeran tawe tipaak ghiit, ve itija taluplup ghiit. Eemon aazne, tipul lupuun to it wa. Tauvene yes aat tamtamon to it duduun mako. Imin ta yes tamtamon to it duduun, kanan irau tipul ghiit mako, ve tilepleep tomani ghiit soone. Ngar tau

* **2:15:** Mt 6:24; Ro 12:2; Yems 4:4 * **2:17:** 1Kor 7:31 † **2:18:** Yesu koia tane, yes Griika tiwaato ila tauzi aliijazi tighe “Antikrais.” (Antikrais puughu tauvene: Krisi koia, ma tamtamon tau ipakur tauu ighe igham Krisi niia.) * **2:18:** Mk 13:6; 2Tes 2:3; 1Yo 4:3

tighamu na, ene itotoi zi ighe muun, yes tamtamon toit duduun mako. *

²⁰ Eemon yam amin zeran tawe mako. Pasaa, Maaron patabuyaaj igham tauu Avuvu payam wa. Ve yam asov awatagh saveen onoon. ²¹ Yau naghe yam akankaan pa saveen onoon, ta nabood rau tane ilat ne mako. Saveen onoon, yam awataghi wa. Ve yam awatagh: Saveen onoon irau imin puughu pa karom eta mako. Puughu tane ta nabood rau tane ilat payam.

²² Sei ta neer to karom? Neer to karom, ene i tau izoroor saveen ighe: “Yesu, i Mesia mako.” Tamtamon tauvene, i Krisi koia. I ighur muuri pa Krisi ve Tamaan Maaron paam. *

²³ Pasaa, tamtamon tisov tau tighur murizi pa Maaron Naatu, ene Tamaan Maaron ileep tomani zi mako. Eemon isaav ighe tamtamon eta ivotia ghuruun ila tooni ighe i ighur ila to Maaron Naatu, ene Tamaan Maaron paam ileep tomania, ve yesuru tivalupu zi timin eemon. *

Iit aat takis saveen onoon tunja ila loloon, ve tataghon pooz to Avuvu Patabuyaaj

²⁴ Tauvene saveen onoon tau tisavia payam muun ve ilam na, matamim ingalngali ve akisi tunja ila lolomim irau saawe. Leso aleep tunja ila to Tamaan Maaron ve Naatu Yesu Krisi. *

²⁵ Lepoogh tauvene itaghon saveen mbuaan tau Yesu igham pait na. Pa muun, i isaav ighe iit pale

* **2:19:** Mban 20:30 * **2:22:** 1Yo 4:3; 2Yo 7 * **2:23:** 1Yo 4:15, 5:1; 2Yo 9 * **2:24:** Yo 14:23; 1Yo 1:3

tagham lepoogh poia ila to Maaron taghon taghon gha ila. *

²⁶ Saveen tane, yau naboode ilat payam, leso matamim imomoos poi pa zeran karomña tau tighe tipaghau gham pa eez to Maaron. ²⁷ Eemon yam, Kisi igham tauu Avuvu payam, ve Avuvu tana ilepleep tomani gham irau saawe. Tauvene yes tau tizoornugh tighe tipaghazonai gham pa Maaron aliinja na, lezi uraat eta payam mako. Pasaa, Maaron Avuvu tauu ipaghazonai gham pa gabua naol isov. Ve ngar tau i ipaghazonai gham pani na, ene karom mako. Ene onoon mon. Tauvene yam aat ataghon ngar tana, leso aleep tunja ila to Kisi irau saawe. *

Taleep tunja ila to Kisi, ve tasan muleen tooni

²⁸ Natugna, aleep tunja ila to Kisi irau saawe. Leso saawe tau i imuul ilam ve itotoi tauu ivot ighazon, iit taroi pa tala tagharauu sov, ve mayaan ila maata sov. *

²⁹ Yam awatagh: Kisi, i neer to ngar duduunja. Tauvene yam irau awatagh aghe: Tamtamon tisov tau titaghon ngar duduunja na, Maaron igham zi timin paaghu, ve timin i natja wa. *

3

Iit taleep imin Maaron natja

¹ Aghita. Tamaan Maaron loolo igheen toit ve ipakur ghiit kat. Pasaa, i ipoi ghiit ighe tauu natja iit. Ve saveen tane, ene iduduun. Aazne, Maaron

* **2:25:** Yo 6:40, 17:3; 1Yo 5:11

* **2:27:** Yo 14:26, 16:13+; Hib

8:10+ * **2:28:** Ep 3:12; 1Yo 4:17

* **2:29:** Tit 3:5; 1Yo 3:7, 4:7;

3Yo 11

igham ghiit tamin i natja. Eemon yes tau titaghon taan ngara na, tighilaal ghiit mako. Pasaa, yes tighilaal Maaron mako. *

² Yam zeran tsiau, lolog igheen tsiam kat. Aazne, iit tamin Maaron natja wa. Ve saa lepoogh tau murei pale taghamu, ene iit takankaan pani. Pasaa, Maaron ipaghazonai ghiit pa gabua tana soone. Eemon iit tawatagh: Saawe tau Krisi imuul ilam gha itotoi tauu ivot ighazoon, ve taghit katini, ene aat taleep imin i tauu. *

³ Tamtamon tisov tau tighurghur matazi pa gabua tane na, yes aat tigharaat tauzi, lesa tingalaan ila Maaron maata imin Krisi tauu. *

Yes tau tileep tunja ila to Krisi na, tinoknok ghamuun ngar saghati mako

⁴ Tamtamon tisov tau tigham sosor, ene timalaan pa tutuun to Maaron. Pasaa sosor, ene ngar to tamalaan pa Maaron tutuun tooni.

⁵ Ve yam awatagh: Krisi, i le sosor eta mako, ve izilam taan to ireu sosor toit. *

⁶ Tauvene isaav ighe tamtamon eta ileep tunja ila to Krisi, i irau inoknok ghamuun ngar saghati mako. Ve isaav ighe neer eta ighamgham ngar saghati irau saawe, ene itotoia ighe i ighilaal Krisi soone. Tamtamon tauvene, iwatagh Krisi mako. *

⁷ Natugja, neer eta itombaan gham ve ipaghau gham pa eez to Maaron sov. Yes tau titaghon

* **3:1:** Yo 1:12, 16:2+; Ro 8:15+ * **3:2:** Mt 5:8; Ro 8:29; 2Kor 3:18

* **3:3:** 2Kor 7:1 * **3:5:** 2Kor 5:21; Hib 9:26; 1Pe 2:22+ * **3:6:** Ro 6:1, 14; 1Yo 2:4

ngar duduunja imin Krisi itaghoni, ene yes mon ta tiduduunj ila Maaron maata. *

⁸ Eemon isaav ighe tamtamon eta ighamgham sosor irau saawe, ene i neer to Sadan. Pasaa, saawe imin maata kat ve ilam, Sadan ighamgham ngar saghati. Eemon Maaron Naatu izilam taan ve itotoi tauu ivot ighazonj, leso ireu uraat to Sadan isov ilale. *

⁹ Tauvene yes tau Maaron igham zi timin paaghu na, tighamgham sosor irau saawe mako. Pasaa, Maaron tapiri tau igham zi timin paaghu na, ighengheen toozi. Tauvene yes irau tinoknok ghamuunj ngar saghati mako. ¹⁰ Tauvene eez to taghilaal Maaron natja ve Sadan natja, ene vene: Isaav ighe tamtamon eta inoknok ghamuunj ngar tau iduduunj ila Maaron maata mako, ene i tamtamon to Maaron mako. Ve isaav ighe neer eta loolo pa tonvetaz to Krisi mako ve ighamgham poghani zi mako, ene i paam, tamtamon to Maaron mako. *

Loloon pa tauun

¹¹ Saawe imin maata tau yam aghur ila ve ilam, yam alonlooj saveenj tauvene: Iit aat loloon pa tauun ve tavaghamu poghani ghiit. *

¹² Tauvene iit tataghon Kain ngar tooni sov. I, Neer Saghati ighamu imin le, tauta iburig ve irav sorokin taazi Avel gha imaas. Ve puughu mindai ta iravu imaas? I ngar tooni saghati, ve taazi ngar tooni poia ve iduduunj ila Maaron maata. *

* **3:7:** Ro 2:13; 1Yo 2:29 * **3:8:** Yo 8:44; Hib 2:14 * **3:10:** 1Yo 2:29, 4:8, 5:18 * **3:11:** Yo 13:34, 15:12 * **3:12:** Gnp 4:8; Hib 11:4

¹³ Yam ton̄vetaz, isaav ighe yes tau titaghon taan ngara na tighur koi payam, na arur ve agham ngar naol sov. *

¹⁴ Iit tawatagh: Iit tapul eez to mateegh wa. Ve aazne, tataghon eez to Maaron, tauta tagham lepoogh poia ila tooni. Pasaa, loloon igheen to yes ton̄vetaz to Krisi ve taghamgham poghani zi. Ve isaav ighe tamtamon eta loolo igheen to yes ton̄vetaz to Krisi mako, ene i itaghon eez to mateegh. ¹⁵ Tamtamon tisov tau tighurghur koi pa ton̄vetaz to Krisi, ene Maaron ighit zi ighe yes raratezi imin neer tau irav tamtamon imaat. Ve yam awatagh: Yes tau tirav tamtamon timaat na, lepoogh to mataan yaryaare igheen toozi mako. *

¹⁶ Saawe tau Yesu Krisi ipul tauu gha imaat pait, i itotoi ngar to loloon pa tamtamon ivot ighazoon pait. Iit paam aat tataghon ngar raraate, ve tarei tauun pa yes ton̄vetaz to Krisi. *

¹⁷ Isaav ighe neer eta irao pa gabua to taan, ve ighita mbolaan igham ton̄vetaz eta to Krisi, eemon loolo isaghatini ve iuule mako, ene pale mindai? Ngar to Maaron tau i loolo pa tamtamon ve ighamgham poghani zi na, pale igheen to neer tana ma mako? Ene aat mako. ¹⁸ Natug̃a, isaav ighe tasavsaav sorok ila avoon uuli taghe loloon pa tamtamon, ve saveen̄ toit le anoon̄a mako, ene poia mako. Ngar tauvene, ene karom. Iit aat tataghon saveen̄ toit, ve tagham anoon̄a ivot. Leso avoon onoon. *

* **3:13:** Yo 15:18, 17:14; 2Tim 3:12

* **3:15:** Ga 5:19+; Syg 21:8

* **3:16:** Yo 15:13; Ro 5:8; Ep 5:2

* **3:18:** Yems 2:14, 22; 1Pe 1:22

Eez to tayooz ila Maaron naagho toman tintiin

¹⁹ Tauvene iit aat loloon pa tamtamon ve tagham poghani zi. Leso tawatagh taghe iit tataghon saveen onoon. Ve saawe tau tayooz ila Maaron naagho, iit pale loloon poia. Irau taroi ma mayaana ne mako. ²⁰ Onoon, saawe siriv, tayamaan ila loloon taghe taduduun ila Maaron maata mako. Eemon poia to Maaron, ene tiina kat, ve ngar tooni iliiv ngar toit. Isaav ighe mataan kisin gabua ru tane, ene pale ipalot ghiit, lesa taroi pa yozeen ila Maaron naagho sov.

²¹ Yam zeraan tsiau, lolog igheen tsiam kat. Isaav ighe tayamaan ila loloon taghe leen sosor eta ila Maaron maata mako, ene pale taroi pa yozeen ila i naagho mako. *

²² Ve isaav ighe taghasoni pa gabua eta, i pale iloon ghiit ve igham pait. Pasaa, mataan kisin tutuun tooni ve tataghon zi, ve taghamgham ngar tau ighamu loolo poia. *

²³ Tutuun tooni, ene vene: Iit aat taghur ila to Naatu Yesu Kisi, ve loloon pa tauun ve tavaghamu poghani ghiit itaghon tutuun tau Yesu tauu isavia pait na. ²⁴ Tamtamon tisov tau matazi kisin tutuun tooni ve titaghon zi na, yes pale tileep tunja ila to Maaron, ve Maaron ileep tunja ila toozi, ve tivalupu zi timin eemon. Ve Avuvu tau Maaron igham pait na, tauta igham ghiit taghilaal taghe Maaron ilepleep tomani ghiit irau saawe. *

* **3:21:** Ro 5:1; Hib 4:16, 10:22 * **3:22:** Mbo 34:15; Mt 7:7, 21:22;
Yo 9:31, 14:13 * **3:24:** Yo 14:23, 15:10; Ro 8:9

4

Tagabiiz poghania saveen to yes tau tivovotia Maaron aliinja

¹ Yam zeran tsiau, lolog igheen tsiam kat. Aazne, propet karomnja naol tilaghlaagh izi taan. Tau-vene isaav ighe tamtamon eta isaav payam ighe: “Yau navovotia saveen itaghon pooz to Maaron Avuvu.” Na aghur ila saveen tooni rekia sov. Yam aat agabiiz poghania: Onoon Maaron Avuvu igham pooz pani, ma mako? *

² Eez to taghilaal yes tau Maaron Avuvu igham pooz pazi na, ene vene: Tamtamon tisoov tau tisaav ghazonja tighe: “Yau naghur ila to Yesu Krisi naghe i izilam taan, ve imin tamtamon,” ene titaghon pooz to Maaron Avuvu. * *

³ Ve isaav ighe tamtamon eta isaav ghazonja tau-vene mako, ene Maaron Avuvu igham pooz pani mako. I itaghon pooz to avuvu ite. Ene avuvu tau ipapazaagh tamtamon to tighur koi pa Yesu. Muun, yam aloon tighe avuvu tawe pale ilam. Ve aazne, i ilam ivot izi taan wa. *

⁴ Eemon natugna, yam tamtamon to Maaron. Ve yam atatan zeran karomnja tawe gha aliiv zi wa. Pasaa, Maaron Avuvu tau ilepleep ila lolomim na, tapiri iliiv i tau ipapazaagh tamtamon gha titaghon ngar to taan na. *

* **4:1:** Mt 7:15; 1Tes 5:20+; 2Yo 7 * **4:2:** Eez ite to tatoor saveen ziiri tane, ene vene: Tamtamon tisoov tau tisaav ghazonja tighe: “Yau naghur ila to Yesu naghe i Mesia tau izilam taan ve imin tamtamon,” ene titaghon pooz to Maaron Avuvu. * **4:2:** 1Kor 12:3; 1Yo 5:1 * **4:3:** 2Tes 2:3+; 1Yo 2:18, 22; 2Yo 7 * **4:4:** Yo 16:33; 1Yo 5:4+

⁵ Zeran tawe, gabuazi tomania saveen toozi ito-toi zi ighe yes to taan. Tauta yes tau titaghon ngar to taan na, tilonloon alinjazi. ⁶ Eemon iit to Maaron. Tauvene isaav ighe tamtamon eta iwatagh Maaron, i aat iloon alinjamai. Ve yes tau tiwataghi mako na, tiloon alinjamai mako. Ene eez to taghilaal tamtamon ve tawatagh: Yes titaghon pooz to Maaron Avuvu tau isasavia saveen onoon, ma titaghon pooz to avuvu karom tau ipapaghau tamtamon pa eez to Maaron? *

Isaav ighe loloon pa Maaron, ene aat loloon pa tamtamon paam

⁷ Yam zeran tsiau, lolog igheen tsiam kat. Iit tasov irau loloon pa tauun ve tavaghamu poghani ghiit. Pa ngar tauvene ilam pa Maaron. Tamtamon tisov tau lolozu pa zetazna ve tighamgham poghani zi na, Maaron igham zi timin paaghu ve timin i natja, ve tiwataghi wa. ⁸ Ve isaav ighe neer eta loolo pa tamtamon mako ve ighamgham poghani zi mako, ene i iwatagh Maaron mako. Pasaa, ngar to loloon pa tamtamon ve tagham poghani zi, ene Maaron ngar tooni. ⁹ Maaron imbaan Naatu anoonja eemon izilam taan, leso igham ghiit taleep poia taghon taghon gha ila. Ene ipaghazonai ghiit ighe Maaron loolo igheen toit kat. *

¹⁰ Ngar to loloon pa Maaron ve tamtamon, iit tataghoni irao mako. Eemon Maaron, i loolo pait kat. Aghita. I imbaan Naatu anoonja eemon izilam

* **4:6:** Yo 8:47, 10:26+ * **4:9:** Yo 3:16; Ro 5:8

taan, ve imaat imin watoon^{ra} to ireu sosor toit ve itatan aatyavyav to Maaron. *

¹¹ Yam zeran tsiau, lolog igheen tsiam kat. Isaav ighe Maaron loolo pait kat tauvene, na iit paam, aat loloon pa tauun ve tavaghamu poghani ghiit.

¹² Onoon, tamtamon eta ighit katin Maaron soone. Eemon isaav ighe loloon pa tauun ve tavaghamu poghani ghiit, ene itotoi ighe Maaron ileep tunja ilam toit, ve ngar tooni tau loolo igheen to tamtamon ve ighamgham poghani zi, ene igheen ariaan ila loloon wa.

¹³ Maaron igham tauu Avuvu pait wa. Tauvene iit tawatagh: Iit taleep tunja ila tooni, ve i ileep tunja ilam toit. *

¹⁴ Tamaan Maaron imbaan Naatu izilam taan to igham mulin iit tamtamon to taan. Ve yei nighit katin uraat tooni tawe, ve nighazoon pa puughu. Tauta nipariaan saveen^a, lesa aghur ila. ¹⁵ Isaav ighe tamtamon eta isaav ghazoon^a ighe i ighur ila ighe Yesu, i Maaron Naatu, ene Maaron ileep tunja ila tooni, ve i ileep tunja ila to Maaron, ve yesuru tivalupu zi timin eemon. ¹⁶ Tauvene ngar to Maaron tau loolo igheen toit ve ighamgham poghani ghiit, ene iit taghilaalo wa. Ve taghur ila taghe ene onoon.

Ngar to loloon pa tamtamon ve tagham poghani zi, ene Maaron ngar tooni. Tauvene isaav ighe iit takis ngar tana tunja, ve tataghoni irau saawe, ene aat taleep tunja ila to Maaron, ve i ileep tunja ilam toit, ve itin^a tavalupu ghiit tamin eemon. ¹⁷ Isaav ighe takis ngar to loloon pa Maaron ve tamtamon

* **4:10:** 1Yo 2:2 * **4:13:** 2Kor 1:22

igheen tunja ila loloon, ene saawe to Mbonj Murei, iit aat leen roinj pa gabizoon to Maaron mako, ve tayooz ila naagho toman loloon poia. Pasaa, saawe tau taleep izi taan, iit tataghon ngar tau Kriisi ighamu na. *

¹⁸ Tauvene isaav ighe takis ngar to loloon pa Maaron ve tamtamon ariaan, ene irau taroi pani mako. Pasaa, roinj puughu, ene vene: Taroi pa atuya to sosor toit. Tauvene isaav ighe neer eta iroi pa Maaron, ene itotoi ighe ngar to Maaron tau loolo pait kat ve ighe igham poghani ghiit na, i ighazoon pani soone. *

¹⁹ Maaron loolo igheen toit ve igham poghani ghiit imin maata. Tauta aazne, iit loloon pani, ve loloon pa tamtamon paam. ²⁰ Tauvene isaav ighe neer eta ighe i loolo igheen to Maaron, eemon ighurghur koi pa yes tonvetaz to Kriisi, ene i neer to karom. Pasaa, tonvetaz to Kriisi, i ighit zi pa maata. Eemon Maaron, tamtamon eta irau ighita mako. Tauvene isaav ighe neer eta loolo pa tamtamon mako ve igham poghani zi mako, ene i irau loolo pa Maaron paam mako. ²¹ Tauta Kriisi ighur tutuun tane pait: Tamtamon tau ighe loolo pa Maaron, i aat loolo pa yes tonvetaz to Kriisi paam, ve igham poghani zi. *

5

Takis ghuruun ila toit ariaan. Leso tatatan ngar to taan

* **4:17:** Yems 2:13; 1Yo 2:28, 3:19+ * **4:18:** Ro 8:15 * **4:21:** Yo 13:34+; Ep 5:2; 1Yo 3:11

¹ Tamtamon tisov tau tighur ila tighe Yesu i Mesia, ene Maaron igham zi timin paaghu, ve timin i natja wa. Ve tamtamon tisov tau lolozi igheen to Tamaan Maaron na, lolozi pa Maaron natja paam. *

² Isaav ighe loloon pa Maaron ve tataghon tutuun tooni, ene pale tawatagh taghe iit loloon igheen to Maaron natja. ³ Pasaa, eez to tatotoi tauun taghe loloon pa Maaron, ene vene: Mataan kisin tutuun tooni ta naol ne, ve tataghon zi. Ve tutuun tooni, ene ipatajan pait to tataghon zi ne mako. *

⁴ Tamtamon tisov tau Maaron igham zi timin natja, yes titatan ngar to taan. Ve eez to tatatan ngar to taan, ene vene: Tayooz ariaan ve takis ghuruun ila toit tunja. *

⁵ Savunugha irau titatan ngar to taan? Ene yes tau tighur ila to Yesu tighe i Maaron Naatu. Yes tana mon ta irau titatan ngar to taan. *

Gabua siriv tau titotoi Yesu tighe i Maaron Naatu

⁶ Yesu Krisi imin tamtamon ve izilam taan, ve igham yaa, ve sinj tooni imalin gha imaas izala ai pambaroon. I igham yaa mon mako. Igham yaa, ve murei sinj tooni imalin paam. Ve Maaron Avuvu ipariaan Yesu saveen tooni paam, leso taghur ila. Pasaa, i isasavia saveen onoon. ⁷ Tauvene gabua tol tau tipariaan ghiit to taghur ila to Yesu, ene vene: ⁸ Avuvu Patabuyaana, yaa ve sinj. Gabua tol tane, ngarazi raraate. ⁹ Saawe naol, iit taghur ila

* **5:1:** Yo 1:12+ * **5:3:** Mt 11:30; Yo 14:15, 21+; 2Yo 6 * **5:4:**
Yo 16:33; Ep 6:16; Syg 12:11 * **5:5:** Ro 8:37; 1Kor 15:57

saveen tau tamtamon tisavia to tipariaan zetazna saveen toozi. Eemon Maaron, i iliv iit tamtamon kat. Tauvene isaav ighe i ipariaan saveen to Naatu, iit aat taghur ila le taghur ila kat. *

Isaav ighe taghur ila to Yesu, ene tagham lepoogh poia ila to Maaron wa

¹⁰ Isaav ighe tamtamon eta ighur ila to Maaron Naatu, i aat iyamaan ila loolo ighe gabua tau i ighur ila na, ene onoon. Ve isaav ighe tamtamon eta ighur ila tooni mako, ene i ivelegh Maaron ighe i aavo karom. Pasaa, saveen tau Maaron isavia to ipariaan saveen to Naatu na, tamtamon tana ighur ila mako. ¹¹ Saveen tauvene: Lepoogh poia tau iseenja taghon taghon gha ila na, Maaron igham pait wa. Lepoogh tawe, taghamu ila to Naatu. *

¹² Tauvene tamtamon tau ighe igham Maaron Naatu, ene igham lepoogh poia ila to Maaron wa. Ve tamtamon tau ighe igham Maaron Naatu mako, ene igham lepoogh tawe mako. *

¹³ Saveen isov tane, yau naboode pa yam zeran tau aghur ila to Maaron Naatu, lesa yam awatagh kat aghe yam agham lepoogh poia ila to Maaron wa. Lepoogh tawe pale iseenja taghon taghon gha ila. *

¹⁴ Tauvene iit taroi pa ghasoniin Maaron pa leen gabua sov. Pa ighe taghasoni pa gabua eta itaghon i loolo ve ngar tooni, i aat iloon ghiit ve igham gabua tana pait. ¹⁵ Ve iit tawatagh: Maaron ilonloon sunuun toit irau saawe. Tauvene isaav

* **5:9:** Yo 5:32, 8:17+ * **5:11:** Yo 1:4, 17:3 * **5:12:** Yo 3:36, 5:24 * **5:13:** Yo 20:31

ighe iit taghasoni pa gabua eta, i aat iloonj sunjuunj toit, ve igham pait. *

¹⁶ Isaav ighe iit taghita tonjvetaz toit eta igham sosor tau Maaron irau ireua, iit aat tasunj Maaron. Leso igham mulin tamtamon tana, ve imuul ilam pa eez to lepoogh maata yaryaare. Ve yes tau tighur murizi pa Kriisi, ve ngar toozi iyaryaanj kat na, leg saveenj eta pazi mako. Zeran tauvene, irau taghason Maaron pazi mako. Pasaa, yes lezi eez eta muul mako. Murei, yes pale timaat gha tilalez. *

¹⁷ Onoon, ngar sasaghati isov, ene sosor. Eemon sosor siriv irau igham ghiit tamaat gha talaleen ne mako.

Yoan ipasov saveenj tooni

¹⁸ Iit tawatagh: Tamtamon tisov tau Maaron igham zi timin paaghu na, yes tinoknok ghamuunj ngar saghati mako. Pasaa, Maaron Naatu maata pazi ve inginngin zi. Tauvene Neer Saghati irau ivaghamun zi mako. *

¹⁹ Ve iit tawatagh: Iit tamtamon to Maaron. Eemon eval tiina to taan, yes tileep ila Neer Saghati niima, ve i ighamgham pooz pazi. ²⁰ Ve iit tawatagh: Maaron Naatu izilam taan, ve ipagha-zonjai ngar toit, lesa tawatagh katin Maaron tauu. Tauta aazne, iit taleep ila to Maaron tauu ve Naatu Yesu Kriisi, ve itinja tavalupu ghiit tamin eemon. Yesu Kriisi, i Maaron tauu. Ve i ta imin puughu pa lepoogh maata yaryaare. *

* **5:15:** Yo 14:13, 16:23 * **5:16:** Hib 6:4, 10:26+ * **5:18:** 1Yo

3:9 * **5:20:** Yo 17:3

²¹ Natugņa, matamim imomoos poi pa taumim,
ve aleep soghan pa maaron karomņa tisov. *

* **5:21:** 1Kor 10:14; 2Kor 6:16

Maaron Saveen Tooni Patabuyaana
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 11 Nov 2022 from source files dated 9 Oct 2020

adb844f0-d769-5b05-9dd0-7c01fca938bb